

17/11/1999

Pemuda diarah henti melobi

KUALA LUMPUR, Selasa - Pemangku Ketua Pergerakan Pemuda Umno, Datuk Hishammuddin Tun Hussein Onn mengarahkan semua ahli pergerakan itu supaya menghentikan usaha melobi dan menumpukan usaha memastikan kemenangan calon Barisan Nasional (BN).

Sehubungan itu, beliau meminta ahli Pemuda Umno sama ada di peringkat bahagian atau negeri, pulang ke tempat masing-masing dan teruskan perjuangan bagi memastikan kejayaan calon BN.

Menurutnya, beliau sudah memantau gerakan Pemuda di semua peringkat dan memberikan ruang yang seluas-luasnya kepada ahli pergerakan itu untuk menyampaikan mesej perjuangan BN.

Katanya, sebagai Pemangku Ketua Pergerakan Pemuda Umno dan mempunyai hubungan dengan pucuk pimpinan, beliau sedikit sebanyak cuba memberi penjelasan mengenai perkara yang berbangkit.

"Kebelakangan ini semua tahu dalam keadaan kita hendak menentukan calon, macam-macam cerita sama ada di peringkat bahagian, negeri dan Pusat disebar.

"Daripada apa yang saya terima, spekulasi yang diketengahkan kepada saya adalah perkara yang tidak berasas.

"Kita sudah memberikan ruang seluas-luasnya kepada mereka (Pemuda) mengetengahkan pendirian dan hujah mereka. Sekarang ini masa untuk mereka turun dan buat kerja...ini termasuk Pemuda yang menawarkan diri untuk bertanding sebagai calon dalam pilihan raya umum.

"Saya sesungguhnya mengenali dan mengambil kira semua pandangan mereka yang ingin mendapatkan tempat di kawasan masing-masing," katanya pada sidang akhbar di kediamannya di sini, hari ini.

Ahad lalu, Pengerusi BN, Datuk Seri Dr Mahathir Mohamad mengarahkan pergerakan Pemuda dan Wanita BN memberi tumpuan kepada kawasan masing-masing bagi menggempur pembangkang untuk memastikan kemenangan majoriti dua pertiga.

Hishammuddin berkata, tindakan segelintir ahli Pemuda yang menghabiskan masa di Kuala Lumpur melayani spekulasi yang tidak berasas membazirkan masa dan sedikit sebanyak menjejaskan kewibawaan mereka sendiri.

(END)